


Aber ein fünfeck auß vnueruckten zirkel zu machen/dem thue also/Reiß zwen zirkel durch einander/also das eins ytelichen ründe/durch des andern Centrum gee/vnd die zwen Centra a.b. zeuch mit einer geraden lini zusamen / das wirdet ein leng einer seyten des fünften eckes/ wo aber die zirkellini an einander durchschneiden / da setz oben ein.c.vnden ein. d. vñ reiß ein gerade lini.c.d. Darnach nym den vnueruckten zirkel vnd setz in mit dem ein fuß in den puncten.d. vñ mit dem andern reiß durch die zwen zirkelrhyß/vñ ire bede Centro.a.b. vnd wo die zwen runden riß durch schnyten werden/da setz.e.f. Aber wo die aufrecht.c.d.durch schnyttē wirdet/da setz ein.g. Darnach zeuch ein gerade lini.e.g.gar hyn auß byß an die zirkellini/da setz ein.h.darnach zeuch ein andre gerade lini.f.g.biß an die zirkellini da setz ein.i.zeuch darnach.i.a.vñ.h.b.gerad zusamen/so werden drey seyten des fünfecks/vnd von dañ laß zwü gleich seyten leng vom.i.h.oben zusam reichen/so wirdet ein fünfeck/wie ich das vnden hab aufgerysen.



Auß diesem fünfeck begibte sich zumachen/durch hilf des vorgemachten dwangels/ ein fünfze heneck/dem thue also/Reiß auß dem Centro.a.ein zirkelrhyß/vñnd reiß darein die seyten des dwangels oben.b.vnden.c. Darnach nym die leng der seyten eins fünfecks / vnd leg das eyn ort in den puncten.b.vnd das ander end leg an den zirkelrhyß/da hyn setz ein.d.so bleibe zwischen.d.c. ein teyl ober/das selb zirkelrum teil mit einem puncten.e.in zwey gleiche teyl/so du dann.e.c.mit einer geraden lini zusamen zeuchst/so wirdet darauß ein seyten eins.15.eckes/das im zirkel herumb dryß/wie ich das vnden hab aufgerysen.